

Nunatsinni demokratiimik tamallu oqartussaaqataanerannik qanoq paasinnittariaaseqarnerput pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq, Aqqalu C. Jerimiassen, Atassut)

Akissuteqaat

(Isumaginninnermut, Suliffeqarnermut, Nunamullu Namminermt Naalakkersuisoq)

Siunnersuuteqartoq Aqqalu C. Jerimiassen Apeqquteqaat aallaavigalugu oqallisissiamut siunnersuummik matuminnga saqqummiussineranut Naalakkersuisut qutsavigaat.

Tamat oqartussaaqataanerat qanoq paasineripput kiisalu inuiaqatigiit oqartussaaqatigiilluni aqunneqartut qanoq isiginerivut, siunnersuuteqartup apeqqutigai? Aammalu qinersisoqarnerani oqartussaaqatigiinnerup nassuiarnissaa taamaallaat naammannersoq. Oqartussaaqatigiinneq qanoq nukittorsarniarparput?

Tamat oqartussaaqatigiinnerat aamma oqartussaaqatigiinneq inuiaqatigiinni kalaallini tunngaviusumik naleqartitaapput. Naalakkersuisut oqartussaaqatigiinneq inuiaqatigiit aqunneqarneranni periaatsitut isigaat, tassani inuiaat sinniisussaminnik qinersinissamut aammalu aalajangiinerit ingerlaneranni taaseqataanissaminnik periarfissaqarlutik. Tamatuma kingunerisaanik Inatsisartuni, kommunalbestyrelsini nunaqarfinnilu aqutsisuni amerlanerussuteqartut inuiaat piumasaannik saqqummiisussaapput. Kisianni tamanna isumaqanngilaq aalajangiinerit ingerlaneranni ikinnerussuteqartut mattunneqassasut. Paarlattuanik taasinerit tamarmik tusarneqarnissaat oqartussaaqatigiilluni oqallinnermut aalajangiisuulluinnarput. Naalakkersuisut partiit tamaasa suleqatiginissaannut aammalu politikikkut aalajangiinissanik suliaqarnerni kikkut tamarmik tusarneqarnissaasa qulakkeernissaanut immikkut suliniuteqarput. Suleqatigiinneq taanna ukiumi kingullermi aningaasanut inatsisip akuerineqarnerani takuneqarsinnaavoq, tassani partiit tamarmik Kalaallit Nunaannut pitsaasumik akisussaassusilimmillu aningaasaqarnikkut politikkeqarnissap qulakkeernissaanut peqatigiipput.

Taamaattoq oqartussaaqatigiinneq qinersinerinnarmit aammalu innuttaasut qinigaasa aalajangiinerinnaanit annertuneruvoq. Tassani innuttaasut pisinnaatitaaffii aamma pineqarput. Inuiaqatigiinni oqartussaaqatigiilluni ingerlasuni inuit pisinnaatitaaffeqarnerat ilisarnaataavoq, tassani oqaaseqarnissamut kiffaanngissuseqarneq, tusagassiortut killilersugaannginnerat katerisimaarnissamullu killilersugaannginneq ataqqineqarlutik. Tunngaviusumik pisinnaatitaaffeqarnerit taakkua, innuttaasut isummaminnik annissinnaanissaannik aammalu ammasumik naapertuilluartumillu tamat oqallinneranni peqataasinnaanissaannik qulakkeernissamut aalajangiisuulluinnartumik pingaaruteqarput.

Inuiaqatigiinnut oqartussaaqatigiittunut kiffaanngissuseqarneq pisinnaatitaaffiillu kisimik pineqanngillat, kisianni aamma innuttaaqatitsinnut akisussaassuseqarneq ataqqinninnerlu aamma pineqarmata. Peqatigiilluta ataatsimooqatigiinnerup nukittorsarnissaa nunatsinnilu ataqatigiissinnaaneq sulissutigissavagut, tassani kikkut tamarmik inuiaqatigiinni peqataanissamut aammalu naligiillutik periarfissaqarfimminnik atuinissamut periarfissaqassallutik.

Ajoraluartumik amerlasuut tusaaneqaratik misigisimapput aammalu aalajangiiffigineqartussat ungasissorujussuarmit aalajangiiffigineqartartut misigisarlugu. Qanitani oqartussaaqatigiinnerup nukittorsarneqarnissaa sakkortuumik pisariaqartinneqarpoq, tamannalu kommunit aaqqissugaanerit pillugu oqallinnermi akuttunngitsumik eqqaaneqartarpoq. Innuttaasut qanitani oqartussaaqatigiinnerup annertunerunissaanik ujtartuisartut tusaaneqarlutik misigisimanissaat aammalu qanoq oqartussaaqatigiinneq nukittorsarsinnaaneripput aallaavigalugu suliassat oqallisigineqartarnissaat, pingaaruteqarpoq.

Naalakkersuisut kommunit peqatigalugit suleqatigiissitaliamik, kommunit avinneqarnerat pillugu apeqqummik qimerluuinissamik suliaqartussamik, pilersitsipput. Tamatuma saniatigut killissaliussat atuuttut innuttaasunik sullissinnermut qanitamilu oqartussaaqatigiinnermut qanoq pingaaruteqarnerisut, innuttaasut misilittagaat misigisartagaallu aallaavigalugit kommunit aaqqissugaanerit naliliivigineqartussaavoq.

Inuiaqatigiinni oqartussaaqatigiinnerup nukittorsarnissaanut ataatsimoorluni akisussaaffeqaratta erseqqissassallugu pingaaruteqarpoq. Suliassaq qinikkanuinnaq suliassanngortinneqarsinnaanngilaq, kisianni innuttaasut ataasiakkaat tamarmik immikkut suleqataasussaapput. Tamanna inuiaqatigiinni eqeersimaartumik peqataanissamut akisussaaffimmik tigussisaagut aammalu neriulluarnartunik allanngortitseqataassaagut.

Taamatut Naalakkersuisut sinnerlugit oqaaseqarlunga pilersitsiviulluurtumik oqallinnissaq aammalu nunatsinni oqartussaaqatigiinneq qanoq nukittorsaqqissinnaaneripput isummersuutissi isumassarsiassilu tusarnissaat qilanaaralugu.